

REPÚBLIKA DEMOKRÁTICA TIMOR-LESTE
PARLAMENTU NASIONAL

ESTATUTU KONA BA GRUPU FETO PARLAMENTAR TIMOR-LESTE NIAN
Halo alterasaun iha loron 12 fulan Marsu tinan 2008

Sei konsidera ba buat ne'ebé mak hakerek iha artigu sira 16.º no 17.º Konstituisaun Repúblika Demokrátika Timor-Leste nian, no iha nesiedade halo promosaun ba iguallade feto-mane (jeneru), no Estadu halo intervensaun makas atu hatun deziguallade sosial no ekonómika mak mosu iha feto ho mane nia laran;

Sei konsidera katak halo violénsia hasoru feto sira sei halo nafatin iha sosiedade Timor-Leste nia laran, no sai nudar obrigasaun Estadu nian atu sasan no hadok feto sira hasoru tipu violénsia oin-oin;

Sei konsidera katak kampu traballu nian iha Timor-Leste sei hala'o halo diskriminasaun hasoru feto sira, selu feto sira osan fulan nian ki'ik liu fali mane sira nia osan fulan;

Sei konsidera mos tratadu internasional sira ne'ebé mak Timor-Leste asina no obrigasaun sira ne'ebé mak mai hosi tratadu sira ne'e hodi halo promosaun ba iguallade feto-mane (jeneru), hanesan mos importánsia iha ita nia partisipasaun iha Rede Feto Parlamentar nian iha CPLP;

Sei konsidera katak halo promosaun ba iguallade feto-mane (jeneru) sai nudar Objektivu Dezenvolvimentu Milénio nian;

Sei konsidera katak iha nesiedade atu Parlamentu Nasional Timor-Leste tau matan ba halo formulasaun no ezelesaun ba medida no polítika sira iguallade feto-mane (jeneru), hanesan mos halo preparasaun no diskusaun ba relatóriu kona ba Kuda (Implementasaun) Konvensaun kona ba Hakotu Forma sira Hotu atu halo Diskriminasaun hasoru Feto;

Sei konsidera katak Parlamentu Nasional aprova ona iha loron 28 fulan Marsu tinan 2008 **REZOLUSAUN HOSI PARLAMENTU NASIONAL n.º 06/2006**, halo publikasaun iha Jornal Repúblika, iha loron 12 fulan Abril tinan 2006, ho hanoin atu hari'i Grupu Feto Parlamentar Timoroan nian;

Tuir ho termu sira ne'e no ho hanoin ikus atu regula ninia kompozisaun rasik, organizaun no funsionamentu, sei aprova Estatutu kona ba Grupu Feto Parlamentar Timor-Leste nian ida ne'e.

KAPÍTULU I

Dispozisaun Jeral (Tomak)

Artigu 1º

Halo definisaun

Grupu Feto Parlamentar Timor-Leste nian, iha ne'e ba oin sei bolu nudar GFPTL, hanesan grupu ida ne'ebé mak buka halo konsentrasaun hodi feto sira bele hetan partisipasaun ativa iha polítika no hodi halo promosaun ba kestaun sira kona ba igualdade feto-mane (jeneru).

Artigu 2º

Kompozisaun

GFPTL sei forma hosi feto parlamentar hotu ne'ebé mak hala'o hela sira nia knar iha Parlamentu Nasional, no la hare ba sira mai hosi partidu ne'ebé deit.

Artigu 3º

Halo Kompromisu

Deputada sira ne'ebé mak forma ka sei mai forma GMPTL, buka halo kompromisu atu:

- a) Haburas liu tan soromutu parlamentar sira, hodi bele fo hanoin ba sidadaun timoraon sira no halo kolaborasaun atu bele iha transformasaun sosial ida uainhira uza plataforma igualdade feto-mane (jéneru) no sidania feto sira nian;
- b) Hato'o lejislasaun no ezekusaun polítika públika atu halo dezvoltamentu sustentável no funu hasoru dezigualdade sosial; halo promosaun hodi dada tama feto sira, no mos hakru'uk ba pluralismu no diversidade populasaun nian, hanesan mos katuas, ema sira ne'ebé mak presiza espesial sira no, hosi ema sira seluk, hanesan omoseksual sira;
- c) Hatama iha lejislasaun nasional direitu no garantia fundamental sira mak hakerek iha dokumentu internasional sira ne'ebé mak Repúblika Demokrátika Timor-Leste mos asina;
- d) Haklean dialogu ho sosiedade sivil, movimentu sosial, organizasaun feto sira nian, nune'e bele hadia diak moris ema hotu-hotu nian no haluan demokrasia polítika, sosial no ekonómika;
- e) Fo kontribuisaun atu halo formulasaun no ezekusaun ba polítika públika sira hodi fahe rendimentu, liu-liu, funu hasoru kiak no hasa'e kapasidade feto sira iha mundu rural.

Artigu 4º

Objetivu

GFPTL nia objetivu tomak mak tuir mai ne'e:

- a) Halo promosaun ba atividade sira ne'ebé mak buka atu hasa'e tan reprezentasaun no partisipasaun feto iha polítika nasional;
- b) Halo promosaun ba soromutu, hodi troka esperiensa no pratika diak kona ba kestaun sira ne'ebé mak koalia ba promosaun ba igualdade feto-mane (jeneru), no kona ba funu hasoru diskriminasaun no dezigualdade;

- c) Halo promosaun ba dezentvolvimentu iha koperasaun ho Rede Feto sira Parlamentu Nasional hosi Estadu Membru CPLP nian, hanesan mos ho grupu hanesan hosi Parlamentu sira seluk;
- d) Fo tulun ba partisipasaun Feto Parlamentar sira iha atividade ne'ebé mak hala'o hosi Rede Feto sira Parlamentu Nasional hosi Estadu Membru CPLP nian, grupu hanesan hosi Parlamentu sira seluk, no entidade nasional ka estranjeiru sira seluk, fo facilidade ba kontaktu ema mesak no intuituisaun hosi ninia membru sira;
- e) Halo kontaktu ho instituisaun oin-oin nasional no rai liur nian ne'ebé mak halo estudu ba tema sira ne'ebé mak kait ho objetivu sira GFPTL nian;
- f) Halo dezentvolvimentu ba atividade sira tomak ne'ebé mak hare katak iha utilidade atu hala'o nafatin objetivu sira ne'e.

KAPÍTULU II

Organizasaun

Artigu 5°

Meza

1. GFPTL nia meza sei forma hosi Prezidente, hosi Vise-Prezidente no hosi Sekretária.
2. GFPTL nia meza sei hili ho rotatividade hosi maioria votu feto Parlamentar nian ba perídu tinan rua ho balu lejislatura nian.
3. Hahu lejislatura ida-idak no liu tiha lora lima nia laran uainhira hatene tiha Feto Parlamentar sira ne'ebé mak atu ba tu'ur iha Parlamentu Nasional, GFPTL sei halibur ho ukun iha tempu badak hosi Feto Parlamentar ida ne'ebé mak tinan boot liu sira seluk, hodi hahu hala'o grupu nia servisu no hili nia Prezidente, vise-prezidente no sekretária sira.
4. Liu tiha perídu tinan rua ho balu lejislatura nian, GFPTL sei halibur ho ukun Prezidente tuan nian, hodi hili fali GFPTL nia Meza foun.

Artigu 6°

Delegasaun

Meza, ho autorizasaun GFPTL nian, bele fo parte ninia kbi'it no kompeténsia ba Deputada ruma hosi Parlamentu Nasional mak hala'o hela nia knar efetivu.

Artigu 7°

Prezidente nia kbi'it (kompeténsia)

Prezidente iha kbi'it atu:

- a) Reprezenta GFPTL iha rai laran no rai rai liur;
- b) Bolu, ukun no hala'o soromutu sira GFPTL nian;
- c) Halo projektu ba orden lora nian kona ba soromutu GFPTL, uainhira rona tiha Deputada sira seluk;
- d) Halo proposta ba planu atividade tinan GFPTL nian;
- e) Fo hatene ba Meza Parlamentu Nasional lia tatoli, esplikasaun, konvite, proposta no hanoin sira mak haruka mai grupu ne'e;

- f) Fo hatene ba Meza no ba Plenáriu Parlamentu Nasional, hanesan mos ba instituisaun seluk públika ka entidade privada ruma, kona ba deliberaun, desizaun no deklarasaun halo hosi GFPTL;
- g) Hala'o knar sira ne'ebé mak hakerek iha Estatutu ida ne'e.

Artigu 8º

Vise-Prezidente nia kbi'it (kompeténsia)

Vise-Prezidente GFPTL mak troka Prezidente uainhira nia la mosu no impedimentu ruma no fo tulun, nafatin, ba Prezidente iha ninia knar.

Artigu 9º

Sekretária nia kbi'it (kompeténsia)

1. Sekretária GFPTL nian iha kbi'it atu:

- a) Asina, hamutuk ho Prezidente, akta no dokumentu sira kona ba atividade GFPTL nian;
- b) Halo rejistu ba surat ne'ebé mak tama no fo hatene ba Feto Parlamentar sira kona ba surat sira ne'e;
- c) Halo preparasaun ba soromutu GFPTL nian;
- d) Halo preparasaun no fahe agenda servisu nian kona ba soromutu GFPTL nian;
- e) Hakerek votasaun, halo sura votu no fo sai rezultadu sira;
- f) Halo ligasaun ho grupu feto parlamentar hosi rai liur nian no ho núkleu apoiu sira nian rasik;
- g) Halo preparasaun ba proposta kona ba programa tinan-tinan;
- h) Halibur no fo sai informasaun ho interese kona ba atividade GFPTL nian;
- i) Halo preparasaun no elaborasaun ba relatóriu tinan-tinan kona ba atividade GFPTL nian;
- j) Halot no rai arkivu GFPTL nian.

Artigu 10º

Hosi subgrupu sira

- 1. Ho maioria simples, sei bele hari'i subgrupu sira, forma, ho nuneru minimu, hosi Deputada nain tolu.
- 2. Subgrupu sira sei hili ninia Prezidente no Vise-prezidente rasik, hanesan mos Relatora ida.
- 3. Subgrupu sira iha responsabilidade atu la'o tuir, estuda no halo investigasaun kona ba matéria ka tema spesífiku sira, mak kait ho objetivu prioritáriu sira GFPTL nian.
- 4. Subgrupu sira, funsiona ho forma permanente, hakotu sira nia knar kedas, uainhira Meza foun ida simu pose, tuir ho Artigu 5º hosi Estatutu GFPTL nian.

Artigu 11º

Sekretaria Ezekutiva

- 1. GFPTL hetan tulun iha termu sira knar nian hosi Sekretaria Ezekutiva ida.
- 2. Sekretaria Ezekutiva iha kbi'it, hosi knar sira seluk:

- a) Halo arkivu, rejistu iha livru rasik no, uainhira presiza, haruka atu halo publikasaun ba aktu sira tomak, ofisial ka la'e, GFPTL nian;
- b) Simu konvite, reprezentasaun, petisaun no memoria mak haruka mai GFPTL;
- c) Simu no halo surat ofisial GFPTL nian.

KAPÍTULU III

Funsionamentu

Artigu 12º

Soromutu

1. GFPTL sei halibur iha soromutu ordinária dala ida fula-fulan no iha soromutu estraordinária uainhira Prezidente husu ka maioria Feto Parlamentar husu.
2. La halakon asuntu sira seluk atu koalia, GFPTL buka halo analize, iha prazu fulan ida nia laran uainhira hahu sesaun lejislativa ida-idak, ba projektu kona ba programa atividade nian.
3. Uainhira hakotu sesaun lejislativa ida sei aprova surat ka dokumentu ida ne'ebé mak koalia kona ba programa atividade, relatóriu atividade no konklusaun sira nian.
4. Bele bolu hodi partisipa iha soromutu Deputadu, ex-Deputadu no ex-Deputada, membru Governu nian no ema seluk no entidade sira ne'ebé mak GFPTL hanoin katak sira nia prezensa sai importante, maibe la iha direitu ba votu.

Artigu 13º

Quórum ba funsionamentu

GFPTL sei halibur uainhira iha prezensa Deputada sira nian liu metade.

Artigu 14º

Quórum deliberativu

Halo deliberasaun sira GFPTL nian sei foti desizaun hosi Deputada sira ho maioria bain-bain.

KAPÍTULU IV

Dispozisaun ikus

Artigu 15º

Halo alterasaun ba Estatutu

1. Halo aprovasaun ba alterasaun ba Estatutu ida ne'e sei liu hosi votu maioria absoluta.
2. Feto Parlamentar ruma bele halo proposta hodi altera Estatutu ida ne'e, naran katak iha proposta ne'e mai ho justifikasaun badak ida.
3. Proposta hodi halo alterasaun ba Estatutu sei haruka, liu hosi surat, ba Prezidente GFPTL, iha tempu badak mak sumana rua nia laran molok atu hala'o soromutu ordinária ne'ebé mak sei diskute kona ba proposta hodi halo alterasaun ne'e.

Artigu 16º

Duvida no omisaun sira

1. Duvida no omisaun sira ne'ebé mak sei mosu iha aplikasaun no interpretasaun ba Estatutu ida ne'e sei rezolve ho konsensu hosi Meza GFPTL nian.
2. Iha interpretasaun no integrasaun ba falla sira iha Estatutu ida ne'e sei mos tau iha konsiderasaun Estatutu no Rejimentu Parlamentu Nasional nian.

Artigu 17º

Tama iha vigor

Estatutu ida ne'e sei tama iha vigor uainhira hetan tiha ninia aprovasaun hosi GFPTL.

Dili, loron 12, fulan Marsu, tinan 2008.

Deputada Maria Paixão de Jesus da Costa
Prezidente – GFPTL

Deputada Josefa Alvares Pereira Soares
Vise-Prezidente – GFPTL

Deputada Maria da Costa Exposto
Sekretária – GFPTL